

## 宋真宗廣生帝君讚

若夫典治喬嶽表正靈祇司生發于東方仿聰明於上  
帝宜乎名冠仙籍德被蒸民饗祀典于蕭薌鏤徽稱於  
金石者也屬以虔修封禮恭答神庥薦顯號以致誠述  
斯文而頌美讚曰

節彼岱宗奠茲東土生育之地靈仙之府爰有高真允  
司剛命至神不測虔誠斯應茂實克昭儲祥是繫式奉  
嘉名用伸精意

大中祥符元年十月二十七日御書院奉勅莫勒刻石

## 加青帝懿號詔

勅中書門下名嶽配天乃衆山之推長盛德在木實品  
物之資生惟真宰之斯存蓋靈篇之攸紀青天真君職  
司煦育道叶冲虛贊元化於高明庇羣生於溥率真祠  
夙建方志可徵屬嚴駕以時巡爰密封之成禮式瞻神  
館冀篤冥休祇舉典章載揚懿美奉徽名而昭薦旌元  
德於無方用表欽崇永綏福祉宜尊懿號曰青帝廣生  
帝君觀宇特加修飾故茲詔示想宜知悉

大中祥符元年十月二十五日下

## 御祝文

大中祥符元年歲次戊申十一月戊午朔四日辛酉崇  
文廣武聖明仁孝皇帝謹遣尙書兵部員外郎邵曄告  
於青帝廣生帝君伏以峻功不宰誕彰陰騭之仁神化  
無方實主發生之宇惟高真之幽館奠喬嶽之靈區屬  
以祇奉元符躬陳大報仰繫景貺克舉上儀式昭□□  
之稱以表欽崇之禮合申致告用達虔誠謹□言

右共一碑前刻序讚大字後刻詔祝文字稍小